

**Oqaluuserisassanut nassuiaat.**

(Inatsisartut Siulittaasuut)

Aningaasaqarnermut Ataatsimiititaliaq qinnuteqarpoq oqaluuserisassani immikkoortoq 113-ip aappassaaneerneqarnissaata kinguartinneqarnissaanik. Immikkoortoq 113-ip qulequtaraa: Uunga siunnersuut: KNI A/S pillugu Inatsisartut peqqussutaata allanngortinneqarneranik Inatsisartut inatsisaat nr. xx, xx 2016-imeersoq. (Ingerlatseqatigiiffissuup KNI-p suliaasa killilerneqarnerat)

Immikkoortup ulloq 26. oktober aappassaaneerneqarnissaa siunnersuutigineqarpoq.

Ilaqutariinnermut Peqqissutsimullu Ataatsimiititaliaq qinuuteqarpoq oqaluuserisassani immikkoortoq 122-ip UPA2017-imut kinguartinneqarnissaanik. Immikkoortoq 122-p qulequtaraa: Siunnersuut uunga: Imigassat aalakoornartortallit pillugit Inatsisartut Inatsisaat nr. xx, ulloq xx.xx 2016-imeersoq.

Nunanut Allanut Sillimaniarnermullu Ataatsimiititaliaq qinnuteqarpoq oqaluuserisassani immikkoortut 65 aamma 90 aappassaaneerneqarnissaasa ulloq 9. novemberimut kinguartinneqarnissaanik.

Immikkoortoq 65-ip qulequtaraa: Illersornissamut isumaqatigiissutip 1951-imeersup kingornagullu ilassuteqartinneqartup qanoq isumaqatigiinniutigeqqinneqarsinnaaneranut kaammattuutunik saqqummiussisussamik Kalaallit/danskit allaffissornikkut ataatsimiititaliaannik pilersitsinissaq siunertaralugu danskit naalakkersuisuinut saaffiginneqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut, taamaalilluni illersornissamut isumaqatigiissutit aammalu amerikamiut Kalaallit Nunaanni sakkutooqarnerat Kalaallit Nunaannut iluaqutaanerusinnaaqullugit.

Immikkoortoq 90-ip qulequtaraa: Illersornissamut isumaqatigiissut 1951-meersoq tamassumalu kingorna tapiliussatut isumaqatigiissutit tassunga attuumasut nalilersuineramik Inatsisartunut (imaluunniit tatigeqatigiinneq pillugu isertuussineq pisariaqassappat Nunanut Allanut Sillimaniarnermullu Ataatsimiititaliamut) UKA2016-imi saqqummiussinissaanik

Naalakkersuisut peqquneqarnissaannik Inatsisartut aalajangiiffigisassatut siunnersuut. Naliliinermi isumaqatigiissummi naalakkersuinikkut aningaasaqarnikkullu akuusut nunatsinnut qanoq pingaaruteqarneri nalilersorneqassapput, tamassumalu saniatigut Naalagaaffeqatigiinnerup iluani Namminersorlutik Oqartussat isumaqatigiissut malillugu pisinnaatitaaffiisa piginnaaneqarnerisalu erseqqissarneqarneri ilaatinneqassallutik.

Oqaluuserisassani imm. 89-ip ulloq 28. oktober oqaluuserineqarnissaa siunnersuutigineqarpoq.

Immikkoortoq 89-ip qulequtaraa: Meeqqat angerlasimaffiup avataanut inissinneqartartut pillugit angajoqqaanut paaseqatigiiffiunerusumik suleqateqarnissamik, ersarinnerusunillu piunasaqaasiortoqartalernissaanik Naalakkersuisut suliniuteqaqqunissaat pillugu apeqquteqaat aallaavigalugu Inatsisartut oqallinnissaannik siunnersuut. Taamaaliornikkut angerlarsimaffiup qimagutsitaaffiusup nakkutigineqarluni, angajoqqaallu qaninnerusumik suleqatigalugit, angajoqqaanik siunnersuineq, katsorsaaneq allanillu angerlarsimaffiup pitsanngoriaateqarfiusumik meeqqanut angalarsimaffimmiit qimagutsitaasimasunut piaarnerusumik angerlartitseqqinnissaq anguneqarsinnaaqullugu.

**Ilaasortat uku akornganni taasisarnerit pillugit isumaqatigiissuteqartoqarpoq:**

Iddimangiiu Bianco, Inuit Ataqatigiit aamma Justus Hansen, Demokraatit